



## Storia di Sero Cristal

Sero Cristal cu e otro seronan manera Sero Plat, Sero Gerard, tabata claramente un pueblo di Indjan. Su centro tabata "Indian Bieu" cu un bunita piedra grandi manera un adak. E piedra aki por a sirbi masha bunita pa misa ora cu un sacerdote Spaño tabata bin bishita Aruba. Parti pabou di Sero Plat tin ainda un caminda pa subi sero cu e nomber "Caminda Indjan".

Tur e puntonan di seronan menciona tin un muestra di un bibadero Indjan cocolishi, klekan y pida wea, pero cosnan di Europa ta falta eyden, mientras cu Indjan Bieu ta yen yen di majolica (potchi di klei), glas, etc. E Spañonan mes tabata biba den e centro di e seronan y e Indjannan na e puntonan mas afo pa wak lama. Ta haya dies luga asina ey banda mes riba sero.

Rond di Sero Cristal ta haya e siguiente luganan di biba: Kuruburi (cunucu di Guillermo Kock). Wariruri pariba di Sero Gerard, tur dos cu cosnan di Europa, hasta tambe un pida brons of koper manera un klokki. Sin majolica, pipa y glas, pero cocolishi, wea Indjan y piedra di lama como marca di un cas Indjan tin ademas na: Wariruri contra di sero Budui, Matavidiri riba sero dos luga y banda di Brug Natural uno, hasta te den Sabanilla Abou di un piedra grandi. Luego na Behia, rooi pabou di Sero Plat, Sero Sumpiña den Babijn y riba sero di Hubada.

Tur e luganan ey tin hopi piedra grandi, di modo cu e Indjannan por a sconde nan curpa masha bon. Segun marcanan ta mustra, nan tabatin nan cas sea na un plato chikito riba lomba di un sero, sea banda di un piedra grandi cu ta wanta solo y biento, sea bou di un piedra, un hol cu ta casi un cas completo manera tin na Labega, Janana, Katiri, Kudawechá y Indjan Bieu.

Tabata na año 1824 cu oro a wordo descubri pa e hoben di 12 año, Willem Rasmijn, cu tabata huntia carnenan di su tata. Muy probabel cu tabatin hende cu a haya oro prome pero nunca a registra. E areanan banda di minanan di Kadushi, Matividiri, Sero Cristal, Wariruri y Babijn tabata e areanan mas coba pa oro, incluyendo e mas tradicional y regionnan manera: Rooi Fluit, Sabanilla, Piedra Cacho, Daimari, Tamarijn, Parca, Sheta y Angochi. E minanan di tunnel mas largo tabata na Sero Cristal, Sero Gerard y Kadushi. Pero e trabou eynan tabata wordo haci na un manera hopi primitivo. Cu un martiu pisa y pat'i cabra e piedranan contenido e oro precioso tabata wordo separa. Despues nan ta wordo poni den un bahul y pasa man pa man y despues pa Bushiribana.

Antoin Erasmus tabata un di e prome mineran mas conoci na Aruba. E ultimo minero tabata su nieto, Andresito Erasmus di Sero Cristal. Tur dia e tabata haci e trabou aki na Sero Cristal pa coba oro y cristal. Su ruman, Mathijs tambe a traha den mina henter su bida, mescoa cu nan tata, Camillo Erasmus. Cabes di e stamboom di Erasmus na Aruba tabata Nicolaas Erasmus of Papa Claras cu tabata casa cu Maria Augustina Falcon. Nicolaas tabatin un barco yama "Landje Criool". Jan Everts tabata capitán di e barco. Nan cas na Playa na 1832 y 1834 tabata na nomber di Maria Augustina Falcon. Tin hende ta pensa cu Nicolaas a bin di Spaña, pero no tin prueba.



Jan Hendrik Yarzagaray y Jan van der Veer tabata di Sero Cristal y voorman e tempo ey. Antoin Erasmus tambe a yega di haya un klompi di oro di 24 liber. Camillo a traha principalmente pa e compania di Bushiribana y tabata voorman cerca Mr. Ibottson, un ingeniero, na Calabas, Tamarijn, Moskita, Bena Sigur, Marawiel, Rooi Fluit y Lorant. Mathijs a traha for di principio, principalmente na Cristal unda e tabata mashinista di e mashin di biento y tambe telefonista. Papa Claras tabata biba na Playa, Antoin na San Barbola y Camillo na Paradera.

**Dufi Kock**

*Escrivtor y Historiador*

*Savaneta 125-F*

*Tel: 584-1201*

*Cel: 592-9417*

[dufikock@gmail.com](mailto:dufikock@gmail.com)